



SALA STAMPA DELLA SANTA SEDE **BOLLETTINO**

HOLY SEE PRESS OFFICE BUREAU DE PRESSE DU SAINT-SIÈGE PRESSEAMT DES HEILIGEN STUHL
OFICINA DE PRENSA DE LA SANTA SEDE SALA DE IMPRENSA DA SANTA SÉ
BIURO PRASOWE STOLICY APOSTOLSKIEJ دار الصحافة التابعة للكرسي الرسولي

N. 0556

Lunedì 31.10.2005

MESSAGGIO DEL SANTO PADRE ALL'EM.MO CARD. JAVIER LOZANO BARRAGÁN NELLA RICORRENZA DEL 50° ANNIVERSARIO DELLA SUA ORDINAZIONE SACERDOTALE

MESSAGGIO DEL SANTO PADRE ALL'EM.MO CARD. JAVIER LOZANO BARRAGÁN NELLA RICORRENZA DEL 50° ANNIVERSARIO DELLA SUA ORDINAZIONE SACERDOTALE

Pubblichiamo di seguito il Messaggio che Benedetto XVI ha inviato all'Em.mo Card. Javier Lozano Barragán nella ricorrenza del 50° anniversario della sua ordinazione sacerdotale:

• MESSAGGIO DEL SANTO PADRE

Venerabili Fratri Nostro
XAVERIO S.R.E. Cardinali LOZANO BARRAGÁN,
Pontificii Consilii pro Valetudinis Administris Praesidi

Una cum tota dilecta communitate Mexicana tum hic in Urbe tum etiam in patria tua, Venerabilis Frater Noster, libentes quidem hoc fausto tempore consociamur illa in communi studiosaque gratulatione quae Tibi his diebus ostendetur, cum videlicet presbyteratus tui aureum commemorabitur iubilaeum.

Prius enim quam Decessor Noster immortalis memoriae Ioannes Paulus II ad munus te arcessivit Praesidis Pontificii Consilii pro Pastoralis Valetudinis Cura, maximam ministerii sacerdotalis tui partem in valde variis ac multiplicibus operibus et inceptis transegeras pro Ecclesia in patria tua, ubi tuae effulserunt pastorales virtutes rerumque agendarum diligentia.

Haud Nobis necesse videtur singula commemorare navitatis tuae frugifera consilia apud Societatem Theologicam Mexicanam, in Instituto Theologico Pastoralis CELAM, at potissimum in communicata curatione episcopali archidioecesis Mexicanae ac deinde duodecim annos provida in gubernatione gregis Zacatecensis ubi singulari quidem amore promovebas cleri renovationem atque structurarum dioecesis confirmationem et dialogum cum cultura.

His deinde apostolatus frugiferi tui meritis omnino addantur oportet plurimae quidem et maximae utilitates quas adfers veluti actuosus sodalis variorum Curiae Romanae officiorum. Nec minus luculenter fulget opus tuum, ut iam innuimus, pro pastoralis valetudinis cura proximos hos novem annos.

Causas itaque invenimus, Venerabilis Frater Noster, cur his Nostris Litteris tibi veluti praesentes omnino gratulemur de sacerdotii tui anniversaria memoria quae incidet Dei beneficio in tricesimum proximi mensis Octobris diem.

Tunc tecum peculiari benevolentia coniungemur, quemadmodum nunc tecum colloquimur, Deo omnium bonorum Auctori gratias tecum referentes tibiue debitas tribuentes laudes de tam fructuoso et vario sacerdotali ministerio. Optantes denique Nos ut diu posthac pro Domino in electa Ecclesiae vinea operari valeas, supernorum auxiliorum pignus certissimum ac benignitatis Nostrae documentum clarum tibi transmittimus, Apostolicam scilicet ex animo Benedictionem Nostram.

Ex Aedibus Vaticanis, die XXVI mensis Octobris, anno MMV, Pontificatus Nostri primo.

BENEDICTUS PP. XVI

[01366-04.01] [Testo originale: Latino]
